

დინამოელები კვლავ დამარცხდნენ

ლვოვი. სტადიონი “დრუჟბა”. 1 ივნისი.

“კარპატი” (ლვოვი) – “დინამო” (თბილისი) 3:2 (2:1).

“კარპატი”: რაკიტსკი, რაფიაკი, ბონდარენკო, პოტოჩნიაკი (სიროვი), ჩორბა, ბროვარსკი, კიკოტი, საგვა, დანილიუკი (კრუჟეი), ხიუაკი, ლიხაჩოვი.

“დინამო”: გოგია, ძოძუაშვილი, ჭელიძე, ებრალიძე, მუჯირი, გავაშელი, ქორიძე (კოპალეიშვილი), გ. მაჩაიძე, დარასელია (რეხვიაშვილი), მ. მაჩაიძე, ყიფიანი.

მსაჯი: ნ. კრილოვი (კუიბიშევი).

დუბლიორები – 4:0.

“კარპატის” გულშემატკივრები განსაკუთრებული ინტერესით მოელოდნენ “ტორპედოსა” და “სპარტაკს” შორის 31 მაისის მატჩის შედეგს. მიზეზი გასაგებია. ლვოვის გუნდს იმდენივე ქულა ჰქონდა, რამდენიც ტორპედოელებს (5) და ამ მცირე მონაპოვრით ორივენი ცხრილის ბოლოში იყვნენ. თუ “ტორპედო” დაამარცხებდა სპარტაკელებს, ლვოველთა მდგომარეობა ჩემპიონატის ამ ეტაპზე საგრძნობლად რთულდებოდა.

მოხდა სწორედ ასე: “ტორპედომ” გაიმარჯვა და ამიტომ “კარპატი” 2 ქულის ადების აუცილებლობის წინაშე დადგა.

თბილისის “დინამო” კი ამ ტურში ერთობ პერსპექტიული ამოცანის წინაშე იდგა. მატჩის მოგების შემთხვევაში მას 10 ქულა უგროვდებოდა, 10 ქულა კი ახლა ლიდერთა ჯგუფია. ასე რომ, სტიმული ორივე გუნდს საკმარისად ჰქონდა.

ძლიერმა წვიმამ, დამძიმებულმა მინდორმა საგრძნობლად გაართულა სათამაშო პირობები, მაგრამ ამას ხელი არ შეუშლია ფეხბურთელებისთვის კომბინაციურ, ენერგიულ თამაშში. სახიფათო მომენტები ხშირად იქმნებოდა ორივე მხარეს.

ანგარიში გაიხსნა 21-ე წუთზე. ლიხაჩოვმა და ხიუაკმა კარგად გაითამაშეს ბურთი, ეს უკანასკნელი ხელსაყრელ პოზიციაში აღმოჩნდა და არ დააყოვნა მისი გამოყენება 1:0.

3 წუთის შემდეგ თამაშის დაწყება ცენტრიდან მოუხდათ უკვე მასპინძლებს, რომელთა მეკარე უძლური აღმოჩნდა ყიფიანის დარტყმის წინაშე – 1:1.

ტაიმის დასასრულს ხიუაკმა მეორედ გამოიჩინა თავი და მისი პარტნიორი კომბინაციის გათამაშებისას კვლავ ლიხაჩოვი გახლდათ – 2:1.

წინ მთელი ტაიმი იყო და წარმატებაზე ფიქრი შეეძლოთ როგორც კარპატელებს, ისე დინამოელებსაც, მაგრამ 49-ე წუთზე, როცა დანილიუკმა ძლიერი, ზუსტი დარტყმით კიდევ უფრო დაანინაურა თავისი გუნდი, თბილისელები ძალიან რთულ მდგომარეობაში აღმოჩნდნენ, თუმცა ისინი ბევრს უტევდნენ, დიდ ძალებს რთავდნენ იერიშებში, ხოლო “კარპატის” დაცვა და ნახევარდაცვა გაჭირვებით ახერხებდნენ ხიფათის უვნებელყოფას. 61-ე წუთზე ყიფიანმა დაახლოებით 30 მეტრიდან მოულოდნელად დაარტყა და ბურთი ისე გავიდა ძელს ქვეშ, რაკიტსკიმ განძრევაც ვერ მოასწრო.

თბილისელებს ქულის ხსნის რეალური შესაძლებლობა შეექმნათ მატჩის დასასრულისთვის, როცა მ. მაჩაიძე მუჯირისგან მიღებული ბურთით საუკეთესო პოზიციაში აღმოჩნდა კარის წინ, მაგრამ მისი საბოლოო დარტყმა ასცდა მიზანს.

რ. ლეჟევი (ტელეფონით).
“ლელო”, 5 ივნისი, 1975 წ.